

Euskal Herriko Ahotsak
ahotsak.com

Joxe Garmendia Gaztelumendi

*Lezo, Gipuzkoa
(1933)*

Aurkibidea



Biografia



Lezoko Irurtzun baserrian jaio zen, baina industrialdea egiteko bota zuten baserria. Aita Irurtzungoa bertakoa zuen eta ama Lezoko Alarguntza baserrikoa. Joxe zazpi bat urte zituenerako garia edo artoa ereiteko goldean aritzen zen idi parearen aurretik jarrita. Aita deskarga lanetan aritzen zen Pasai Antxoko portuan. Joxek zazpi urte zituela hil zitzairen aita. Inguruko baserrietan bezala sagasti ugari zituzten eta sagarra saltzen zuten sagardotegietara. Baserri ondoko eskolara joan zen, Unera, 11 urtera arte. Maistra euskalduna zen eta euskaraz ikasi zuen. Arrebarekin batera hamar urte zituela esnea saltzera joaten zen kalera. Soldadutzatik bueltatu zenean bost urtez igeltsero aritu zen eta gero hamabi urtez Erreterriako Laneran. Hogeita bederatzi urte zituela ezkondu zen Olamarta baserriko Margarita Lopetegirekin eta bertan jarri ziren bizitzen. Bi alaba dituzte eta baserritik bizi dira. Haragitarako behiak hazten dituzte, esnea eta oilaskoak ere saltzen dituzte. Joxek idi parearekin egiten du lan, goldatzen edo aretzen aritzen denean. Beti izan du idi pareia baserrian.

Zintak

LEZ-026

- **Proiektua:** Euskal Herriko Ahotsak
- **Elkarrizketatzailea(k):** Zabala, Edurne
- **Data:** 2009-12-22
- **Iraupena:** 60 min
- **Euskarria:** Bideo digitala
- **Kodifikatzailea:** Elexpuru, Juan Martin

Pasarteak

1. Aitari goldaketan laguntzera zazpi urterekin

- **Erref:** LEZ-026/003
- **Iraupena:** 0:00:55. **Hasi:** 00:03:27. **Bukatu:** 00:04:22
- **Multimedia:** bideoa online ikusgai

Gaia(k):

- Familia eta harremanak » Lagunartea eta familia » Etxeko zereginak

Laburpena:

<p>Sei-zazpi urterekin Jaizkibel ("Aizkibel" dio) atzera joaten zen aitarekin goldan egitera itzulari gisa. Aita zortzi urte zituela hil zitzaion. Umetatik egin du lan baserrian.</p>

Transkripzioa

-Zenbat urte zenitun...
-Sei bat urteko, zazpi iteako, atta difuntuakin Jaizkibelea joaten giñan behian aurea-ta. [...] goldia lurra jiratzeko, ganauakin. Ta atta zazpi urteko hil zen, ta orduko eskola partez behian aurea ibiltzea juaten giñan. Hor, Jaizkibel atzian, baserri batea.
-Itzai, ordun...
-Bai. Behian aurrian ibilli. Goldian lurra jiratzen ta hola ibiltzen giñan.
-Oseake ya sei zazpi urtekin ya...
-Bai! Zazpi urtetako ya juaten nitzan ta... ya zazpik zortzira hil zitzaiten /hil zaiten/ aitta geo... Ta geo etxian, berriz, behi aurrian-ta, artua jorratzen-ta, han aitzen giñan, talua jateko!
-Klaro! Zeatik orduan baratzen o larrian ze lantzen zan? Ze botatzen zan? Artua...
-Artua ta, gariya're itten zen orduan!
-A bai, e!
-Bai. Ogiya itteko gariya're bai ta... Geo ganaduantzako erremolatxa ta, arbiya ta... hola itten zen.

2. Ogia eta taloa egiten

- **Erref:** LEZ-026/005
- **Iraupena:** 0:02:36. **Hasi:** 00:05:34. **Bukatu:** 00:08:10
- **Multimedia:** bideoa online ikusgai

Gaia(k):

- Baserria » Baserriko lanak » Artoa
- Baserria » Baserriko lanak » Garia

Laburpena:

<p>Orea ondo gozatu behar da ogi ona egiteko. Amak bera bidaltzen zuen taloak egitera, onenak egiten zituela-eta. Sukaldeko mahai gainean egiten zen ogi-orea. Ekonomikan erretzen zuten ogia eta txapa gainean taloa. Orain ez dute talorik eta ogirik egiten.</p>

Transkripzioa

- Ta gariya geo, ze iten zenuten gari iriñakin?
- Gari iriñakin-ta, ogiya!
- A...

- Leamiya pixkat bota, ta ogiya, ogiya ona itten zen.

- Bai, bai, bai, bai...

- Ogiya ona...

- Ogiya, zenek iten zun ogiya etxian?

- Itxian, ba amak-eta, guk'e ikasi genun-ta, eozeiñek itten genun geo, ogiya. Masa ondo in...

- Nola iten zan masa hua?

- Masa? Ura bota, iriña jarri eta ura bota ta eskukin goxatu. [...] Talua itteko're in behar du masak ondo gozatu. Ondo gozatu ta, ordun itten zen harrotu, ondo gozatua baldin bazen. Masa ondo gozatu. Ta ogiyak igual-igual. Ta talua itten zun hola, tripa atzen zitzayon, taluai, ogiyai, ondo gazatutzen bazan, erretzen ai zan ga(r)ayian.

- Haizatu...

- Bai. Amak makina bat aldiz esana artua hartzen ai geala, artu jorratzen-ta aitzen giñen atxurrakin-ta: [...] "Hi!, juañ hai itxea ta in hitzik taluak ilunabarrian o hola, onenak hik itten dittuk eta /itte'ittuk/!" Engañatu, han aitzeko. Tamainan'e aittua, taluk itten ta! Geo hua jan ta...

- Eta ogiya iteko masa ze iten zenuten egurrezko mahai baten gañian o...

- Bai, bai, bai. Hala itten zen. Sukaldeko...

- Zer zan, aproposa hortako?

- Ez. Bestela sukaldeko mahaia pixka bat garbittu ta haren gañian paper bat o jarri, ta haren gañian.

- Haren gañian...

- Itten genun zea atea, bee itxurakin jarri, eskuakin-eta reonduak eta atera ta...

- Bai...

- Ta gero?

- Gero labian sartu ta han erre. Bee tamain bat hartu behar zitzaion, gehiegi kiskali ta zea in gabe, [bee tamain bat] bijilatu.

- Eta ze labe zenuten orduan?

- Suak, uain bezalako suak bazien ordun'e!

- Ekonomika?

- Bai, ordun bazien. Sua baju hoik'e bazien, beste egurrezkua biño bagenun guk ekonomika haitakua, ta haitan ondo itten zen, labian. Egurakin sua inta, itten zen orduan.

- Eta han iten zenuten ogiya, labe hartan?

- Han itten genun, bai, bai. Labian itten genun, ogiya. Ta talua, berriz, txapa gañian. Txapa bat aproposa bazen! Ta haren gañian jarri talua ta holako gaia, azpiyan itten zaionian, tak! Buelta eman ta berriz'de beste alleka.

- Ta nola deitzen zitzaion txapa hari? Talua iteko txapari.

- Txapa hari... Uain ez naiz akordatzen nola deitzen zitzaion hari... ta aluminio txapa bat izaten zen, redondo bat izaten zen, bee kierrakin, sartaian gisa, txapa bat.

- Bai.

- Baina izena, ez dakit nola izaten zun harek. Ez naiz akordatzen.

- Ez zea akordatzen... Urte asko pasa dia!

- Urte asko pasa diat a...

- Ta ya... Erabiltzen dezute orain, txapa hori?

- Uain ez. Uain ez dugu taloik-eta itten.

- Ez dezute iten...

- Ez. Uain ogiyik ez. Uain sobra do.

- Uain sobra. Ta orduan falta.

- Orduan falta! Ogiya falta, ordun!

3. Ura errekatik ekartzen baldeekin

- **Erref:** LEZ-026/008
- **Iraupena:** 0:01:05. **Hasi:** 00:09:51. **Bukatu:** 00:10:56
- **Multimedia:** bideoa online ikusgai

Gaia(k):

- Herria, azpiegitura » Berrikuntzak » Argindarra eta ura

Laburpena:

<p>Errekara joaten ziren ur bila bizkarrean bi balde hartuta, egunean birritan edo hirutan. Arropa garbitzeak ere errekan egiten ziren.</p>

Transkripzioa

-Ura ezautu dezu base...

-Ura? Erreka, ura bila. Baldia bat hartu, eur batekin bizkarrian zintzilik bi balde hartu errekatik eta halantxe. Ur bila. Ta arropa garbitzea're, erreka, ta han arriya jarriya, ta hola, aitzen zien, emakumiak'e.

-Eta ura nola garraiatzen zenuten? Nola ekartzen zenuten? Nun ekartzen zenuten baserrira ura.

-Baldian!

-Ah...

-Baldetan. Bizkarrian hartu, ta esku zintzilik espaldatik zintzilik bi balde ekarri, ta etxian harraskan onduan jarri, ta poto batekin handik gastatu.

-Bai, bai, bai...

-Bat ontziyak garbitzen ta...

-Ta eunero ur billa.

- Eunero ta eunero bitan ta hirutan igual! Billa... Bi ta hirutan'e bai, baina biaje asko in behar izaten zen, gastatu asko itten zen ta!

-Ta zein joaten zan ur billa?

-Ui!... Tokatzen zena!

-Bai.

-Beste anaiak igual, ta ni're bai, ta arreba're bai, ta...

-Baiño pentsatzen dut arropa garbitzea-ta ama-ta arreba-ta jungo ziala, ez?

-Arreba ta ama-ta, bai...

4. Etxerako sagardoa

- **Erref:** LEZ-026/011
- **Iraupena:** 0:01:23. **Hasi:** 00:13:15. **Bukatu:** 00:14:38
- **Multimedia:** bideoa online ikusgai

Gaia(k):

- Baserria » Baserriko lanak » Sagardogintza

Laburpena:

<p>Etxerako sagardoa egiten zuten. Auzoan zegoen dolarea. Orain ere egiten dute, Errenteriako dolare batean, etxeko sagarrarekin. Garai batean sagarra saldu ere egiten zieten sagardogileei.</p>

Transkripzioa

-Zuek bazenuten, sagastiya?

-Bai, bagenun guk'e, bai. Etxeko pitarrak eta sagarduk-eta itten genittun.

-A bai, e!

-Bai, bai.

-Tolaria zenuten, orduan.
 -Guk ez. Auzuan. Auzuan zen tolaría eta hara eramaten genun. Ta han txikitu ta [...] sagardua. Ura botata, ez uan bezela, purua!
 -A ez, e!
 -Ordun ura botata, bai.
 -Bueno, oain puro purua're ez da ez?
 -Uan puru-purua itten dugu.
 -A bai?
 -Bai.
 -A, zuek itten zute?
 -Itten dugu, bai. Tolariak ez ttugu, biño hola eman... Errenteira ematen dugu /emateugu/.
 -A...
 -Zamarbidekuak eman ta itten digu, sagardua.
 -Non iten dezute?
 -Zamarbiden. Txabola o... Zamarbideko eliza, lehen eliza, uain'e han izango da. Haren atzian, oain. Tolare polittak badittu ta harek. Hara eaman ta han itten dugu sagardua.
 -A... beitu, ta sagarra zuena, etxekua.
 -[Sagarra onak'e bai]. Aurten'e bagenun itxeako aiña itteko baiño iaz asko genun. Ta aurten'e itxeako aiña bagenun, ta hiru bukoi bete dittugu / beteittuu/.
 -Baño orduan ze iten zenuten etxeako sagardua ta sagarra saldu're bai?
 -Bai. Bai.
 -Sagarra saldu iten zen.
 -Saldu're itten zan ordun. Etxeako sagardua, pitarra in ta saldu! Xoxak behar tzien ordun'e ta pixkat saldu're ittea [...]
 -Ta ziñek erosten zun sagarra orduan?
 -Sagarzaliak, hola sagardua itten [zen] tokiyak bazien, hola, gaur bezela.
 -Sagardotegitan ta hola?
 -Bai, bai, bazien, ta haik eamaten [zizuten/zittuzten]. Bildu ta prepaatu ta deitu ta beak etortzen zien billa ta... Sagardoaliak.

5. Sagardoa egiteko sagar motak

- **Erref:** LEZ-026/012
- **Iraupena:** 0:00:48. **Hasi:** 00:14:38. **Bukatu:** 00:15:26
- **Multimedia:** bideoa online ikusgai

Gaia(k):

- Baserria » Baserriko lanak » Sagardogintza

Laburpena:

<p>Zenbait sagar mota: erramu sagarra, martzial sagarra, patxulua, mosolua, aldako sagarra, kafandoka, olio sagarra... Jateko ere onak ziren klase hauetariko batzuk. Orain izen diferenteak omen dituzte eta lehengo batzuk galdu egin omen dira. Sagardo ona egiteko sagar geza erabiltzen da gehienbat, baina gaziarekin nahastuta. Txalaka sagarra gazia da. Geza hutsarekin zozoagoa eta goxoagoa irteten da.</p>

Transkripzioa

-Ze sagar klase zeuden orduan?
 -Ordun, erramu sagarra-ta, martziel sagarra-ta, holako zeak, izenak zittuztenak. Patzulua-ta, mozolua-ta, hoik, holakuk bazian, aldako sagarra-ta, erramu sagarra-ta, bazien. Ta, bai... kafandoka-ta, antza're onak zien

hoik. Oliyo sagarra-ta, holako izenak. Sagar klase ona zien [hoik] jateko're!
Gordñik hola jateko ta erreta're bai-ta...

-Klase asko.

-Oain, klasiak diferentiak dia oain. Oain izen diferentiak dittuzte askok, sagarrak. Orduko sagar klaseik ez da oain asko. Ez da azaltzen, oain asko, ordun zien hoik. [...] oliyo sagarra-ta... kafandoka izango da uain'e... Oliyo-sagarra-ta, aldako sagarra-ta holakoik oain gutxi ikusten da.

6. Sagarra biltzen

- **Erref:** LEZ-026/014
- **Iraupena:** 0:01:09. **Hasi:** 00:18:38. **Bukatu:** 00:19:47
- **Multimedia:** bideoa online ikusgai

Gaia(k):

- Baserria » Baserriko lanak » Sagardogintza

Laburpena:

<p>laz 15.000 kilo sagar hartu zituzten, aurten 3.000 bakarrik. Euripean eta presaka bildu behar izan zuten. "Kizkia eta koparekin" biltzen dute sagarra.</p>

Transkripzioa

-Ta uzta ona ematen du?

-E?

-Uzta ona ematen al du?

-Bai. Lehengo urten ona genun! Aurten gutxixio genun, aurten.

-Gutxixio izandu da, ezta?

-Lehengo urtian hamabost mila kilo bildu genittun, e!

-Ostras...

-Bai.

-Asko.

-Aurten hiru bat o hola.

-Hoik'e biltzen lana!

-Bo! Lehengo urten asko genun. Ta egualdiyak txarrak itten zittun! Beti ebiya, ta ebiya, ta... Sagardozaliai eman nahi izaten geniyon ta azkeneako aste bat bakarra jarri zigun. Nahiko bota ta bildu ta emateko. Aste bat bakarra! Asko baitzen, ta ezin enpleatu, lehengo urtian, ta guk'e hartzia nahi genun, ta hantxe, ebiya ai dula sagarrak goittik bota ta biltzen ta aste bat pasa genun.

-Busti-bustiya sagarra.

-Busti-bustiya, bustiya sagarra? bai gu're!

-Baita're!

-Arropa zaharra jantzi, zira zaharrak-eta...

-Zekin biltzen dezute sagarra?

-Kizkiya ta kopakin.

-Ta geo zakua bete.

-Geo, geo zakura bota, bai. Kopa betetzin, geo zakura bota.

-Ta geo ya zakuak eamaten dituzue /eamateittuzue/...

-Bai. Remolkian.

-Tolarian...

-Tolarea.

-Zea, tolare, hara, sagardozalia [mediyo]. Bai. Hiru bat, o milla kilo aldiyan ematen nittun. Remolkia ta kotxia, biyakin.

7. Txikitatik esne saltzen herrian

- **Erref:** LEZ-026/016
- **Iraupena:** 0:01:14. **Hasi:** 00:20:34. **Bukatu:** 00:21:48
- **Multimedia:** bideoa online ikusgai

Gaia(k):

- Baserrria » Baserriko lanak » Herrira saltzera, erostera
- Baserrria » Baserriko lanak » Artzaintza

Laburpena:

<p>Bere denbora guztian ibili da esne saltzen, hamar urterekin hasita. Txikitan arrebarekin joaten zen astoarekin banaketa egitera. Orduko bezeroak hilak dira ia denak.</p>

Transkripzioa

-Zu beti ibilli zea esne saltzen? Urte asko daamazu?
-Bai. Nee denbo guziyan!
-Bai, e!
-Bai. Han'e ibiltzen nintzen.
-Hoi esan behar nizun...
-Han, jaiotako itxian'e, ibiltzen giñan. Arreba ta biyok joaten giñan, kalea, astuakin, ta geo arreba juten zen lanea. Arreba lanea ta nik astua itxea ekarri, azkeneko pizarrak bukatu ta etxea ekarri ta hola-ta, txikitatik hasiya naiz, bai! Uain'e joan itten naiz-ta!
-Eta orduko klientiak mantendu dituzu?
-Ez. Ordukuak ya gehinak galdu izango dia. Gehinak galdu dia, ordukuak.
-Berriyak iten jun zea. Ez?
-Berriyak itten jun naiz, bai, ta xaharrak ya...
-Nola esaten zaio? Parrokiya o...
-Parrokiya, bai. Parrokiya ordukuak, gehinak, xaharrak hil zien ta
-Zenbat urtekin hasi ziñen zu kalea esnia saltzen?
-Ni kalea hasiko nitzan ya hamar urtekin eo. Arrebakin juten nitzan, e!
-Bai. Arrebakin lehenbizi.
-Bai. Arrebakin. Gehienin arrebakin. Ta geo jotzen zen hua lanea.
-Bai.
-Zortzitako lanea joaten zen hor txapa o... Pabrika bertan bazeon ta berta joaten zen, ta geo, gañekuan...
-Atxanekua.
-Bai, hoi da, ta geo gañeko azken pizarrak nik bukatu ta astua itxea ekarri ta hola aitzen giñan.

8. Irungo Euskal Jirara urtero idiekin

- **Erref:** LEZ-026/018
- **Iraupena:** 0:02:32. **Hasi:** 00:23:00. **Bukatu:** 00:25:32
- **Multimedia:** bideoa online ikusgai

Gaia(k):

- Aisia » Jai-giroa » Herriko ospakizunak
- Baserrria » Baserriko lanak » Baserriko animaliak

Laburpena:

<p>Ez du traktorarik sekula erosi. Idi parearekin egiten ditu baserriko lanak.</p>

Urtero Irungo Euskal Jiran (abuztuan egiten den euskal jaia) parte hartzen du idiekin. Apaindutako gurdia eramaten du kalez kale. Idiak erosteko ez dago zailtasun handirik, probarako-eta asko hazten baita oraindik.</p>

Transkripzioa

-Oseake, oain idiya, idi pariakin'e ibiltzen zeate lanian.
-Bai, bai. Hoikin aitze gea.
-Zeatik orduan, lurra lantzeko, bai goldeketan aitzeko, aria pasatzeko, beti idiyakin ez?
-Traktoria ez dut behin'e erosi. Behin'e ez dut erosi, ez, traktoreik. Lehenor iriyakin ta geo, ilusio pixkat Iruna juteko're izaten genun, idiyakin-ta! Ta horrekin, ba, idiyak ez dittut /ettut/ behin'e kendu.
-Ta Irunen zer zeon ba?
-Euskal Jira joaten gea. Agustuan. Euskal Jira-ta, badittut hogeita hamar urte joten nazela, hara. Gehiegi, bai.
-Eta? Iriyak prestatu iten dituzu? Euskal Jirarako?
-Bai. Garbituta-ta, txukunduta, ondo prepatu behar izaten dia /izateia/
-Hoi da...
-Ondo. Bestela, kaka ta usaia ematen [...] jendiak parra itten du /itteu/!
-Eta han ze ite...
-Han ordu pare batin eo... Ordu pare batin itten dugu. Herriyak beak bialtzen digu kamioya, eaman ta ekarri itten digu ta sos batzuk ematen dizkigu, ta klaro, itten dugu toki batian karruak hartu, haik karruak, soziedadiak prepatzen ttuzte karruak, urtero diferentia jarriyez
-Karrozak, ez?
-Karrozak, bai, hoi da.
- Ta hura hartu ta ordu pare batian birian jun, polliki-polliki itten dia /itteia/, jendiai eakutsiz.
-Ta zemuz jutun dia iriyak bidian
-Ondo joten dia /joteia/.
-Bai, e?
-Bai. Oso Ondo. Guriak behintzat. Batzuk badia, hola zipoka pixkat tiraka aitzen dienak, baiño ez, ez... Guriak ondo dia.
-Biño, desberdiña izango da idiya lehenbiziko aldiyan jutun danian o ya urte batzuk damazkinian jutun, ez?
-Bai... Bai... Bost bat urte'o hola aguntatzen dute /aguantatzeue/. Lau o bost urtetik kanbiatze'ittut beti, jeneralin, bati zerbait fallua harrapatzen diote, ateatzen zayote, eta, orduan, eamaten ttugu. Baiño ez, beti lehenguk ondo jutun zien ta nei beti ondo, ondo die gue iriyak.
-Ta idi paria berrittu ber dezunian, nundik ekartzen dittuzu idiyak?
-Iriyak, ba nundik ekarriko dittut... Hok... Bat...
-Erosi egingo dittuzu, baserrin batetik o...
-Bai. Bai. Bat ondatu in zitzaiten ta launa itteko ekarri non, zeatik, Lopenetik'eo... Sestaotik ekarri nun bat oain. Ta lehenguk [...] ekarri nittun... Donostiatik ekarri izandu dittut! Ta tratantiai, ta hola, ekarri izandu dut.
-Baiño oain ez da errexa izango idiya billatzen...
-Bai, billatzen da uain'e, e!
-Bai?
-Uain'e apostuako ta holako-ta iri asko do, e! Asko do. Uain baserriya gutxi, lana iteko.

9. Idiekin baserriko lan guztiak

• Erref: LEZ-026/020

- **Iraupena:** 0:02:42. **Hasi:** 00:26:25. **Bukatu:** 00:29:07
- **Multimedia:** bideoa online ikusgai

Gaia(k):

- Baserría » Baserriko lanak » Baserriko animaliak

Laburpena:

Proba-idiek ez dute lanik egiten baserrian. Berak baserriko lan guztiak idiekin egiten ditu. Aldapa handiak daude eta arriskutsua da traktorea sartzea. Hori bai, badu makinatxo bat lurrari azken ukitua emateko. Arto eta baba asko hartzen dute.

10. Hemengo artoa onena

- **Erref:** LEZ-026/022
- **Iraupena:** 0:01:48. **Hasi:** 00:30:24. **Bukatu:** 00:32:12
- **Multimedia:** bideoa online ikusgai

Gaia(k):

- Baserría » Baserriko lanak » Artoa

Laburpena:

Artoa eta babarruna batera ereiten dituzte. Hemengo artoa erabiltzen dute. Kanpoko motel etortzen da eta horregatik babarruna beranduago erein behar izaten da. Hemengo artoa omen da onena bai talotarako eta bai edozertarako.

11. Santa Kruzeko ferian saritua

- **Erref:** LEZ-026/025
- **Iraupena:** 0:01:05. **Hasi:** 00:34:25. **Bukatu:** 00:35:30
- **Multimedia:** bideoa online ikusgai

Gaia(k):

- Baserría » Baserriko lanak » Herrira saltzera, eroatera

Laburpena:

Hamar abere-buru eraman zituen Santa Kruzeko feriara, Lezora. Han biltzen dira inguruko ganaduzaleak. Saria ere jaso zuen behi suitzarrekin.

12. Belar-metak egiten

- **Erref:** LEZ-026/026
- **Iraupena:** 0:01:20. **Hasi:** 00:35:30. **Bukatu:** 00:36:50
- **Multimedia:** bideoa online ikusgai

Gaia(k):

- Baserría » Baserriko lanak » Baratzea eta soroa
- Baserría » Baserriko lanak » Baserriko tresnak

Laburpena:

Idiekin egiten dute baserriko lan gehiena baina segadora badute belarra ebakitzeko. Malkar handietan ezin izaten da makinarik sartu. Belar-metak nola egiten diren

13. Egunero kalera esnea saltzera

- **Erref:** LEZ-026/028
- **Iraupena:** 0:01:41. **Hasi:** 00:37:44. **Bukatu:** 00:39:25
- **Multimedia:** bideoa online ikusgai

Gaia(k):

- Baserrria » Baserriko lanak » Artzaintza
- Baserrria » Baserriko lanak » Herrira saltzera, erostera

Laburpena:

Egunero jaisten da Joxe esnea saltzera. Hamarretakoa eta tertuliatxoa ere egiten du beste bi lagunekin. Lehenago behi gehiago zituen.

14. Baserriko esnea da gauzarik onena

- **Erref:** LEZ-026/029
- **Iraupena:** 0:01:27. **Hasi:** 00:39:25. **Bukatu:** 00:40:52
- **Multimedia:** bideoa online ikusgai

Gaia(k):

- Baserrria » Baserriko lanak » Artzaintza
- Bestelako kontuak » Gaur egungo kontuak

Laburpena:

Esnea osasunarentzat txarra dela esaten dutenak gezurra omen diote. Medikuek batek esan zion hori predikatzeko eskatu dietela, nahiz eta jakin ez dela egia. Kolesterolarentzat txarra dela? Dena ipuina omen da. Baserriko esnea da gauzarik onena.

15. Esne-makinak

- **Erref:** LEZ-026/030
- **Iraupena:** 0:02:28. **Hasi:** 00:40:52. **Bukatu:** 00:43:20
- **Multimedia:** bideoa online ikusgai

Gaia(k):

- Baserrria » Baserriko lanak » Artzaintza
- Baserrria » Baserriko lanak » Herrira saltzera, erostera

Laburpena:

Esne-makinak jarri dituzte Erreterian eta Oiartzunen. Arrakasta izan dute baina Joxek dio jendea laster aspertuko dela. Berak ez du halakorik ipintzeko asmorik. Gero eta esne ekoizle gutxiago dago eskualdean.

16. Baserriak etorkizun txarra

- **Erref:** LEZ-026/031
- **Iraupena:** 0:02:30. **Hasi:** 00:43:20. **Bukatu:** 00:45:50
- **Multimedia:** bideoa online ikusgai

Gaia(k):

- Iritziak » Bizitzarekiko ikuspegia
- Baserrria » Baserriko bizimodua » Baserriko bizimodua

Laburpena:

Baserriak ez du etorkizunik. Esnea oso gutxi ordaintzen dute. Grasa txarra omen da, baina grasa gutxi badu deskontua egiten diete zentralakoek. Jendea azkar aspertzen da baserriko esnea erosten, egosten lana duelako.

17. Lezoko sagarrak fama handia

- **Erref:** LEZ-026/034
- **Iraupena:** 0:01:38. **Hasi:** 00:49:00. **Bukatu:** 00:50:38
- **Multimedia:** bideoa online ikusgai

Gaia(k):

- Baserria » Baserriko lanak » Sagardogintza

Laburpena:

Garai batean dena sagastia zen Lezo kaletik Gaintxurizketaraino. Fama handia zuen Lezoko sagarrak. Sagardotegiak ere baziren.

18. Baserriari buruzko aurreikuspenak

- **Erref:** LEZ-026/037
- **Iraupena:** 0:01:47. **Hasi:** 00:54:18. **Bukatu:** 00:56:05
- **Multimedia:** bideoa online ikusgai

Gaia(k):

- Baserria » Baserriko bizimodua » Baserriko bizimodua
- Iritziak » Bizitzarekiko ikuspegia

Laburpena:

Baserriak hustu egingo omen dira, irabazpiderik ez baitago. Oso etorkizun beltza iragartzen dio baserriari. Sasiak hartuko omen ditu bazterrak.

19. Etxalde handitako abereen haragia, txarra

- **Erref:** LEZ-026/038
- **Iraupena:** 0:01:35. **Hasi:** 00:56:05. **Bukatu:** 00:57:40
- **Multimedia:** bideoa online ikusgai

Gaia(k):

- Baserria » Baserriko lanak » Abere-hiltzea
- Iritziak » Bizitzarekiko ikuspegia

Laburpena:

Ganaduak haragi ona ateratzeko denetik jan behar du, eta etxalde handitakoak lastoz eta pentsuz elikatzen dira bakarrik. Gero droga sartzen diete azkar hazteko eta pisua hartzeko. Oso haragi eskasa ekoizten dute.

Ahotsak.eus-eko edukiarekin sortutako dokumentu automatikoa.

2026-07-31

CC-by-sa | Ahotsak.eus

Badihardugu Euskara Elkarte

Markeskua Jauregia, 20600 Eibar

943121775 - ahotsak@ahotsak.com